

N'ha la Regenza betg chapì ils segns dal temp?

Egualitad da las schlattainas en posiziuns da cader e direcziun en l'administraziun chantunala

MARTIN CABALZAR/FMR

■ **En in'incumbensa parlamentara sustegnida da 28 deputadas e deputads renfatscha deputada Silvia Hofmann (PS Cuira) a la regenza ch'ella n'haja betg anc chapì ils segns dal temp cun resguardar e promover l'egualitad d'um e dunna en las posiziuns da cader da l'Administraziun chantunala.** La regenza conceda che la maioritad dals posts da cader e da direcziun en l'administraziun chantunala èn occupads actualmain d'umens. La renfatscha pauschala dals 28 parlamentari(a)s che la regenza n'haja betg anc chapì ils segns dal temp vegn dentant refusada. La regenza sa stentia permanentmain da realisar mesiras per cundiziuns da lavur modernas e per stgafir ina megliera cumpatibilitad da professiun e famiglia. La regenza speria dentant er che dapli dunnas s'annunzian per posiziuns da cader e da direcziun. Il Cussegl grond vegn a tractar l'incumbensa me-semna proxima.

Situaziun actuala

La deputada socialdemocratica *Silvia Hofmann* (Cuira) constatescha che l'administraziun chantunala ha actualmain 35 partiziuns da servetsch. Da quellas vegnan 32 manadas dad umens e mo 3 da dunnas. Plinavant sajan 94 pertschient dals uschenumnads „scheffunziunaris“ masculins. Vitiers vegnia ch'ìls stabs dals tschintg departaments ed er ils posts da cader en la Chanzlia chantunala sajan per gronda part en mauns d'umens. Er en posiziuns da cader che sajan vegnidadas occupadas da curt haja la Regenza elegì mo umens, cun excepziun da la nova manadra da l'Uffizi per la scola populara e sport sco er da la vice-chanceliera chantunala. «Concretmain ha la Regenza betg risguardà dunnas per exempel tar l'elecziun en la direcziun dals uffizis da persunal, da l'administraziun da taglia, da l'uffizi da lavur e da l'uffizi



Ensem cun 28 consignantas e consignants pretenda la deputada socialdemocratica Silvia Hofmann in'egualitad d'um e dunna en las posiziuns da cader e direcziun da l'administraziun chantunala.

FOTO SOMEDIA

per la furmaziun media-superiura», concretisescha Silvia Hofmann vers la FMR. Quai malgrà che la regenza haja formulà en sias atgnas finamiras guvernamentalas l'intenziun da realisar l'egualitad da las schanzas tranter um e dunna tar la recrutaziun da persunal en l'administraziun chantunala.

Pretensiuns concretas

Concretmain pretendan las incumbensadras da la regenza ch'ella tegnia quint sco gremi d'elecziun per posiziuns da cader – analog a l'administraziun federala – «evidentmain e visiblamain» da l'egualitad da las schlattainas. Per garantir quai duain las personas che preparan e proponan l'occupaziun da talas plazzas vegnir scoladas correspundentmain per il process da recrutaziun. Plinavant duai il post institui per l'egualitad da las schanzas che è responsabel per il «Plan d'acziun egualitad en l'administraziun chantunala» sustegnair la regenza cun sia savida spezializada.

Chantun sco patrun modern ed attractiv

La regenza punctuescha ch'ella haja – sin fundament d'incumbensas parlamentarias correspundentas – fixà las finamiras da «patrun attractiv» sco punct central da svilup ed integrà quel expressivmain en il program guvernamental 2021-2024. Sin basa da questas incumbensas vegnian tut las plazzas da temp cumplain sin tut ils stgalims ierachics publitgadas da nov cun in grad da 80 fin 100%, la nua che quai è pussaivel. La regenza scriva: «Il plan d'acziun gia instradà è in instrument adattà per megliar tranter auter la cumpatibilitad da professiun e famiglia, per far frunt a la mancanza da personas spezializadas e per posiziunar il chantun sco patrun da lavur modern ed attractiv». Il project «equal21» duai cuntegnair strategias e mesiras concretas che duain vegnir realisadas en quatter fasas fin l'onn 2024. Main intgantada è la regenza da la pretensiun stringenta da las moziunaras e dils moziunaris che pretendan d'imple-

«Concretmain n'ha la Regenza betg risguardà dunnas tar l'elecziun en la direcziun dals uffizis da persunal, da l'administraziun da taglia, da l'uffizi da lavur e da l'uffizi per la furmaziun media-superiura.»

Silvia Hofmann, deputada

mentar mesiras analogas a la Confederaziun. Questas mesiras duain tenor la regenza bain vegnir examinadas en il rom dal project e vegnir surpigliadas sch'ellas èn era adattadas per la situaziun grischna, relativescha la regenza.

Sco quai che l'incumbensadra Silvia Hofmann è s'exprimida vers la FMR èn las expectoraziuns da la Regenza «fitg intschertas e cuntengnan mo decleranzas da voluntad ch'ins veglia examinar quai e tschai». I manchia insatge concret e liant. Il problem saja gea enconuscent gia dapi lung temp, uschia che l'orizont da temp per realisar mesiras concretas saja memia lung, constatescha la moziunara. En il decurs dals proxims onns vegnian radund ina dunsaina da pusiziuns da cader e direcziun vacantas, uschia che la Regenza sco gremi electoral haja la schanza da far insatge concret. En scadin cas vegnia ella a pretender discussiun en il Cussegl grond ed i dettia er signals d'autras partidas che vegnan a s'exprimer en chaussa.